

四庫全書

集部

欽定四庫全書

集部

桂隱詩集卷二

詳校官中書臣閔思毅

侍讀臣孫球覆勘

總校官進士臣朱鈺

校對官中書臣王鍾泰

謄錄監生臣劉田

欽定四庫全書

桂隱詩集卷二

元 劉詵 撰

古體 七言

題曹裕之所藏魯瑞卿神龍臥沙圖

老龍胸有天下雨養道潛身臥洲渚脊鱗十丈黃金橫
鬢沙萬斛玄珠舉意酣太古陰風寒氣接洞庭秋浪怒
黑如海宮仙人燭滅撒華宴水晶蝦鬚之簾橫墮雲階
寒不捲明如虬髯帝子戰勝朝馳歸朝暎下照曳地鏤

甲三百片山焦石沸赤熯萬里焚帝下墨勅搜抉江海
爾不聞吾聞葛陂之竹投水奔雷澤之梭夜逐風雨騰
上天彼非龍身託形似一日乘化竊氣高飛騫嗟爾胡為
失其所胸有霖雨禁不吐坐令時人寸墨寫爾歸囊楮
大呼老龍賤天公前驅飛廉後靈輿一為人間作年豐

題彭宜遠所藏羅稚川山水樓閣圖

平沙蒼蒼鳥未歸烟村四合高復低漁翁兩兩青蓑衣
賣魚直上長楊堤千峰萬峰何崔嵬朽枝瞰水忽倒垂

倦驢向橋欲渡疑後有羸僕勢若追却疑詩人獨尋詩
舍鞍先濟何所之飛樓縹緲山之西中有美人長鬚眉
凭闌相對知為誰豈非海上喬與期宮中琪樹秋離離
彷彿疑有香風吹吾聞蓬萊有此地流水落花隔人世
便當剝買青芒鞋小向是間住千歲

芍藥歌和羅起初

我昔騎鶴遊揚州笑玩奇花大如斗高樓聳出霞錦窠
西施夜醉吳宮酒

高樓西施
皆言花也

珊瑚萬片割曉酥十日名

香猶在手仙家女隊千紅妝碧油簾幙圍四廊風暄日
醉春似夢夢中嫁與姚家黃小園今日忽再見瘦減不
如當日面夜深明月照闌干弱影伶俜似飛燕名花流
落亦可憐志士慷慨悲流年欲呼四相不可共獨醉鴛
黃壓春甕

贈趙中山

中山本舊公子于道有得
早游京師為諸名公所敬

先生昔佩青珊瑚錦袍白馬玉雪膚夜游鈞天聽廣樂
帝旁分食瓊宮酥天風千丈吹綠髮紫鴛七十黃流蘓

手斟北斗酌玉女麻姑曉報滄溟枯東方烏啼白日薄
姓名盡變騎鯨魚華池內養九芝露金房獨照千年珠
肩摩淨名孔雀扇足躡子晉芙蓉車吹笙看月薊門市
從者皆服貂襜褕羣真虛左願聞道親寫文字為其徒
少年經世二十策海水洗盡無留餘始知古來忠孝士
變幻不與常人俱君不見韓亡流落子房子千秋萬歲
傳編書

東園花

東園花西園柳東園昨夜春風來西園臘雪仍折朽東
西雖相鄰一妍顧一醜東園郎君十六餘千金恣買新
豐酒吳姬嬌唱燕娥舞團作花毬大如斗西園月高寒
蕭蕭枯枝過時不作條志士叩角夜寂寥卧聞郎君吹
玉簫獵騎曉出咸陽橋相遇不揖色尚驕可憐貢公棄
梁棟彈冠但望王郎用可憐馬生晚益窮日夜更望蘇
郎官祿重豈知人生各自好誰肯輕裘相與共西園柳
東園花莫浪喜莫自嗟君不見道旁草二月三月蒸紅

霞

天高高

天高高去地幾萬里中隔以魍魎大風之狂豪六月七月旱魃恣虐饕赤日如火銷民膏黍稷千井為黃蒿池魚涸死江沸熬我苦熱毒無處逃前年饑死如牛毛空江窮山鬼晝號嗟哉此事可復遭仰天三嘆天高高

地隆隆

地隆隆下有海水包絡千萬重中有升天降雨之卧龍

不能呼吸此水為年豐山篁枯立山樹紅爨婦曉汲十
里中鋤耰無用掛壁東石光落杖騰長虹郡官擊鼓鞭
靈霑官街十丈塵漲空嗟哉地道成天功俯地頓足地
隆隆

和邵有初見壽

姜牙賣漿天氣肅子幼種豆年不熟秋風拄杖雪滿頭
自分桑麻安杜曲東家公子蓬萊仙錦袍騎鳳高聯翩
談鋒大阿不可挫筆力三峽來無邊我如痾瘵行蹢躅

君步飛凌嵩華巔銅駝陌上一攜手酌我瑤池王母酒
相期更待三千年還以蟠桃為君壽

東華山天一道院歌

太極未判陰陽濛元精蒸氣相通劃然天高與地下
但見積水渺漭行其中我窮其源良為宮天地不死此
其宗神人得之奮以雄超遙長鈇馳大空九州八極命
在躬霓旌絳節紛來從福地蕭爽弭彊風東華之東天
高峯上與元氣為冲融流光揚彩奔靈窿道人羽衣雙

青瞳壽宮玄殿相魏重千石之簾萬石鐘朝撞暮擊無
秋冬聖人在上年穀豐道人吹笙騎鶴追喬松

題盤谷圖

廬陵郡幕賓盤所李君字長翁家歲盤
谷圖非必盤谷也志隱耳為賦長句

千崖蒼蒼倒石懸老檜下瞰空濶森白根上有縈絡斜
下之瀑泉下有縹緲半出之窻軒忽然漁舟散浦淑疑
是秦人桃花之仙源叢林盡處長堤繞柳外沙邊行客
少汀烟漠漠不成雨汀樹踈踈似飛鳥依稀水檻知誰

家疑是唐人洗藥之溫口問君此地何處尋可買不
惜捐千金君言此亦盤谷境我已先從畫中隱嗟君
才氣何堂堂胸藏雷雨未八荒平明走馬入黃閣日
晏文書寫燕行我我奎章九天上白日旌旗下仙仗
秋風挿翮高頽頽雖有此境何由往丈夫英氣多難

攀九環寶懷青山輞川墅龍門灘會買青鞋待君還

夜宿山家

蒼山四合如鐵色滿地藤花白如雪夾澗居人十數家

緯車共響更深月艾烟驅蚊窻僻低棘根通犬門徑窄
破衣袒跣無忤嫌安識人間締與葛

又

山中舊游猶可記竹裏青帘招我醉我傷身世感慨多
野老一杯惟徑睡夜深涼月照髮影數寸星星不成髻
東方欲赤烏亂啼還駕荀輿謝幽致

送王士弘學政滿代

君如代北秋天之豪鷹疾颺呼霜整翮拔地而憑陵下

擊乎壙垠萬里之絕埜上摩乎崑崙千仞不可到之穹
青君如洞庭龍驤之長舟椎牛擊鼓挂帆直指東海而
遨遊雪波如山鯨吞鼉噴霆雨急舟人飲酒笑傲百怪
如安流炎埃積鞫未高舉歲旱水落留洲渚坐令衆禽
野兔得自樂短棹高歌疾飛舞丈夫借逕學校間窮年
講道凋朱顏詩章直欲凌鮑謝文筆正要窺揚班只今
官滿謁青選走馬一日看盡燕然山燕然山盧溝月行
人青絲映華髮人生有命無窮達君不見南陽文學黑

頭磊落雲臺功關西教授三鱣講堂兆三公

兒時喜見雪

兒時喜見雪痴待天雲黃晝觀捲箔憾暝色夜聞攬裘
思曙光佳人踏靴映玉靨獵士鞞馬驂白鳳千金高樓
換美酒樓外三尺酒百觴寶香繡帳春色暖俯視萬里
成大荒便從淮城取元濟直至北海歸蘇郎邇來悔狂
年已過閉門讀書學堅卧蒲團坐几聽蕭瑟畏寒自補
油窻破欲論往事誰復知但見羣兒似昔時

和東坡四時詞

燕子輕寒生院落佳人自捲猩紅幕樓頭風細墮楊花
簾下日長添繡萼纈紋酒暈透瓊肌雙陸初贏笑問誰
閒綰同心當戶立不知花影滿春衣

暮波微縵回廊永酒闌手枕珊瑚冷槐影橫階午簟涼
榴花滿地風簾靜梅酸未試意先顰倦拂琵琶撥未勻
紈扇半閒冰盃凍翠禽兩兩下窺人

瓶浸雙頭蓮顆綠畫闌閒却青奴竹微涼半下水晶簾

坐看踈螢度高屋夜靜樓風時動局隔墻一葉落虛庭
血色鴛羅裁未就月明處處起砧聲

燭暗睡輕聞畫角玉盆脂水紅冰薄深戶無風繡幄垂
小瓶一片梅花落轆轤隔屋轉伊鴉雲母香猊暈宿霞
報道卷簾寒霧重午妝纔試翠鈿花

明妃曲

漢宮美人人不識初出宮門天下惜漢宮歌舞人
不傳琵琶馬上行人憐君王含情重悽惻只在殿

前留不得人生豈是無知音知音已晚徒傷心天
寒衰草沙似雪舉頭惟見漢宮月十年漢使去無
蹤夢中長在明光宮國家和親四海樂不怨君王
悲命薄君不見秋風茂陵英雄才萬里江都嫁昆
莫

漢宮佳麗三千人妾身萬里當和親當時未必恃顏色
正坐命薄無黃金黃河朝渡風蕭瑟邊馬羣嘶笳鼓咽
路逢漢使不道愁復恐君王尚淒絕妾身夕死何足憐

獨以君命難為捐單于調絃親起舞却獨上馬看青天
年年作書寄征雁腸斷雁飛難到漢君恩許贖比賤姬
不效少卿招不歸

前采薇歌

庚午大饑民多采薇而食因借伯夷采薇餓
死意作采薇歌蓋薇亦薇屬而差大山間人
食之謂之迷薇
見朱氏詩註

我不是西山民采薇不粟哀亡殷又不是周戍卒采薇
禦敵踏霏雪年荒良田三尺塵甌懸銚冷兒號嗔長鏡

短錐采薇去東家西家相為羣霜嚴磴滑山路峭月落
鼯啼山鬼嘯曉翻石罅得叢根共憾土枯根亦瘦寸根
入手如寸金春烹作餅碎勞薪鹽空菽盡味慘惡空憶
飯甑曾炊銀人言食薇無穀氣五日十日終亦斃今宵
妻孥暫充腹誰料後來死何地我死願隨行雨仙徧傾
天瓢作豐年薇根滿山人不食天下斗米皆三錢

後采薇歌

春采薇嬰兒拳賣與豪門破肥鮮年年得米不費錢冬

采薇潛虬根白石犂确斲掘難俯身藜莽如獸蹲山寒
雪高衣裂破整藤束縛筠籃荷瘦妻羸子暮候門地確
夜春松節火沸漿浮浮翻小杓濕霧騰騰升土銜熬烹
成餌甘如飴一飽聊償終日餓冬采薇猶可為春采薇
今年根盡春苗稀豪門有米無可賣隴麥短短難接饑
采薇采薇我聞夷齊嘗食之餓死首陽天下悲嗚呼
天高蕩蕩萬物微我死安得蒼天知

釋枯林鐵如意歌

君不是金谷園中石季倫明珠買妾長安春錦絲圍障
輕一世珊瑚高株碎如塵又不是黃鶴樓邊王處仲萬
騎上流縱馳鞚狂醜千石發浩歌唾壺敲碎天為動君
是天台丞相之嫡孫胸中八九吞崑崙少年寶玦落荆
棘再拜禪林依世尊手持鍬如意笑傲典午二豪之富
貴良工精髮生碧花古制蟬螭隱元氣木盃不用輕大
江蛟鯨辟易馮夷僵薊門駿馬疾秋鵲飛箭穿髀心如
忘談經說史似支遁四座公卿遜高論古來豪傑多竄

託槁面布衫塵土混畫蘭千紙生秋風賦詩萬卷老愈
工承平智策無所用落魄行徧江湖中嗟哉爾之如意
兮不願為大梁游俠之袖椎寧落為許行耕野之鋤犁
寶光發匣閭里怪珍重深藏莫輕賣君不見干將莫邪
困豐城化為兩龍飛去延平津利器不試空有神

枯林天台葉西澗丞相之後有才氣能詩以畫
蘭名世頗勇俠或不舟渡水蓋隱于浮屠者嘗
游京師走馬海子上中飛矢流血滿
靴不顧殆歐公所稱秘演之儔與

庚午歲七月自城中歸吉文故鄉南嶺谷平廬陵

印山凡故舊多招飲者飲後輒援筆賦詩五七言
律外得歌行九篇聊書以遣懷云爾

望城岡

楊誠齋入城必從螺岡徘徊望城岡
上故有醉殺螺岡門外私酒之句

楊侯醉飲私酒門今日秋風捲行迹不知更後數十載
何人知我魯登陟憶昔老人攜我行紅顏照路雙鬢青
蹉跎忽亦如此老還望魯城坐衰草衰草秋蕭蕭官亭
路遙遙後有芙蓉亘古之岿堯前渡三江閱人之石橋
百代百代高鳥飄一村一村自漁樵

前醉歌

天青青造就萬古事不平月皓皓照盡世間人醜好人
言天月俱無心平頗醜好皆由人我言人生無智力明
月青天愁所集簞瓢貧士年少死相君蒸乳老無齒販
屠市兒萬戶侯著經儒生白滿頭李君晚役將軍府文
昌碑起韓碑仆啟期九十無一兒遷哲多孫披籍知雄
狐妓圍釵列屋朝雉悲歌夕牧犢楚和抱璞哭山中燕
人寶石緹十重百年老樹同一榦半作犧樽半溝斷古

來憾事何其多
青天明月奈爾何
我有一斗酒
澆君肝
肺之嗟
我青天明月奈爾何

後醉歌

天如輪
我行與之周
八垠月如壁
我坐對之周
一室買
酒酌月月滿
卮買酒澆天天飲之
長風吹天碧
萬里織
雲飛盡月如水
黃金滿塢董將軍
長安夜炬高
焚雲胡
椒八百元
相國翠珥寶釵落
荆棘征南竒
勲泣杜郵屬
鏤憤入洪濤
秋禹山血濺
麒麟閣
機雲夢
遶華亭
鶴破

心詞臣溺滿衣何如讀書閉山扉斷頭博士窘乘障何
如得句支藜杖山中老人無機權青天明月俱欣然愁
亦無可酌有酒只勸月與天青天明月俱欣然

貴賤吟

庚午大饑天下死者相
望秋大熟穀反大賤

春大饑斗粟不易娉婷姬秋大熟三錢直買一斗粟人
間貴賤反掌異賤未可輕貴難恃君不見土龍百拜還
為塵病駒秣豆乘錦裯人間貴賤元無真

冷熱吟

庚午六月雨寒連
旬閏七月如初冬

六月雨重裘不離身七月寒北風吹倒人人言三伏當
大熱天公變化誰料得君不見陰泉升釜蒸成雲獸爐
五更爐如冰人間冷熱君勿驚

飲南山故居

播竿東峙彭家寨

五代時彭玕曾立寨於此

鹿角南繞劉家村彭家

旗槩落草莽

玕敗

劉家衣冠貽子孫百年風土又一變叢

林化壑池成塹山亭楊柳駟馬坊官道豫樟北商店詰
人令族困屠沽疇夫互郎高門閭故家兄弟日益少惟

有老夫長眉鬚少狂幾何忽衰懶歡樂無多飽憂患天寒
木落砧乍急日暮門空客初散餘年定有幾還鄉倚杖
秋風看飛雁

飲谷平李氏

粟黃黍短沙連浦白髮涉江尋故路伍家渡頭篁荻秋
柳侯廟前烟火暮昔時冠蓋風雨凋舅家喬木涼蕭蕭
微吟西州淚自墮欲訪黃墟誰可招社墟左轉增閭室
兩街坐賈如郭邑殺牛壓釀百貨交道逢少年不相揖

尚餘八十病姻兄羅羞饌客空罍瓶夜深山月窺前庭
童稚熟睡二老醒談舊未了荒雞鳴

飲印山田舍

即爍下

少年曾客金竹峯壯歲移住城之中城中金竹幾往來
贏得白髮成衰翁居人興亡秋葉換巧點四方拙閭閻

天公顛倒作竒觀舉世區區事籌算我友秀川羅文學

以通號
通齋

白頭胸著天祿閣我友龍湖李隱君

正則號方
心二公皆

居印山
之近秋風落筆吹行雲干將白虹發原草虫尤夜墮

玄武老談王著經卿與軻感時屈宋能高歌古今坎壈
稱數子數子之外應更多山中秋高月如斗醉呼老農
同舉酒同舉酒滿瓦船便令餘生滿百年飲酒之日萬
五千

中秋阻雨留山中陳氏莊邀飲

去年中秋客洪州桂花莊頭山寺幽少年齷齪事記問
有酒有月無倡酌我獨不眠多往憾坐數古人俱不見
徐生亭柳禿如帚孫氏江流淨橫練長河北斗壓高城

角聲吹斷塞雁鳴此時少年亦酣睡滿城無人看月明
今年中秋住山塢山木早寒作風雨烹羊醜酒亦可樂
但惜無月無佳句憶昔去非當雨夜憾乏知微上天柱
便今天柱可一游老翁畏寒何可留

題劉平妻殺虎圖

君不見杞梁妻夫死但能哀聲悲又不見泰山婦虎食
其夫哭當路人生伉儷重百年閨房無力救所天空餘
肝腸裂千寸高徹遙漢卑重泉何如濱州劉平妻獨勇

殺虎奪夫曳其踵大兒三歲能取刀小兒坐席痴不忍
沙空月落山谷深妾命何輕夫命重當時視虎如兔狐
眼中無虎惟有夫一朝義聲震百郡裴旻李廣皆庸奴
古來君臣亦如此患難正要忠良扶何為當熊待馮媛
何為狄來使鶴戰射猿老將世豈多搏檠車右今不見
秋風展圖毛髮起始信人間有倫紀嗚呼河東女兒扶
眼去其夫若見此圖當潁泚

陳推官伯玉母鍾氏八十一歲受封恭人

相君饒花饌萬羊不如卮酒娛高堂黃金三組車載道
不如榮親受封誥陳公美政多平反有母八表乘錦軒
公餘談政母色解春風滿頰晨加餐天門曉曙光萬
丈聖人錫類恩波蕩鳳花鸞紙動高屋鶴髮翟禕照
華障官僚車馬填巷衢耆老進壽爭攜壺庭中轟轟椎
大鼓諸公能歌公自舞共言遐算古所稀共嘆激勸逢
清時致君澤民要兩盡此母福澤無窮期斑衣兒啼作
歡喜借問何如老萊子奉親從此位近臣借問何如萬

石君

天馬歌贈炎陵陳所安

所安名泰甲寅以天馬賦領薦下第頗不遇故以此嘆之

房精夜墮滎波中
驂馱奮出如飛龍
昂頭星官逐枉矢
振鬣雲闕追天風
漢家將軍三十六
分道出塞爭奇功
當時一躍萬馬盡
蹴踏少海霓旌紅
韓哀謝興伯樂去
蹶塊誤落奚官庸
十年阜樞食不飽
雖有駿步難爭雄
春隨錦韉北陵北
秋臥衰草東阡東
時從鴛駘飲沙澗

未免泥滓沾風駿夜寒首宿山谷迥長嘶落月天地空
時平文軌明蕩蕩萬里窮山無虎帳交河不用踏層冰
裏足山城學馴象吾聞天子之殿十二閑驥駉並收無
棄放金根雲罕出都門喚取雍容肅仙仗

游中華山和胡履平

我游神山如登仙少壯欲往今暮年放身徑上最高頂
下視八極何茫然松風怒起作奔浪樹蟬絕叫疑哀猿
平田分列萬仞下一點彷彿城中烟雷藏洞穴旱行雨

燈隱草石宵懸天三仙從來志當代辛苦學仙亦千載
惟應濟世念未空古殿高居儼金彩白雲不掃花滿地
玄鶴歸來月生海世人慕仙未忘累春謁秋游貌先改
西風鐵笛三千秋何處摩挲更相待

題文山衡陽躍馬圖和須溪韻

將軍紫綬馳燕然丞相白髮祈山前重瞳悲歌泣虞美
伏波眼穿鳶墮水英雄相望千萬年西風荒草迷五原
延秋王孫折金鞭女墻明月銅駝門衡山春濃風日好

紫韁電轉人未老豈知蹶塊追海橫海天如雪狂瀾倒
玉樓十二春衣妍流雲却月爭取憐落花金谷獨一死
蒼旻不語丹心傳劉家的盧空識意金粟龍媒俱久逝
少年相對那得知掩圖醉倚南風睡

贈劉士貴入京

能詩
琴

君不見南風五絃發天上壽域化城春蕩蕩又不見鎬
京雅南開太平宮中笙簧歌鹿鳴慶雲重見二千載虞
周音和落昭代明堂旭日照衮袍石渠仙仗雉扇高文

王宣父迭奏相和應后夔師曠環珮相周遭沉香晝宴
呼李白禮樂昭回發顏色大明早朝列臣甫元氣礪礪
天地裂君今讀書老空山清才雅調誰與班舉頭但覺
州里隘振衣欲往參其間往者蔡家綠綺桐拔自煨燼
傳商宮往者汲縣白華詩一旦高列秘館中丈夫遇合
亦如此請君一跨扶搖風

和盱僧白牛師金山見龍

名如瑩
號牧所

白牛牧所不嫌遠世界大千隨處見前身是龍工畫龍

親向雲濤玩竒變
槎牙滿腹生甲髯
濡墨未掃神先徧
華堂薄射黃金鱗
高幃淋漓水晶殿
長身真許仙叟騎
怒甲已從神禹見
旁觀辟易不敢撓
硯有風雲筆生電
江南嚴冬喧雷車
驚電滿城飛石轉
頗疑天官下取圖
未識人間餘幾片
嗚呼僧繇去世誰
敢許相望高風千
萬古

和楊用宏

誠齋族子

南溪古木臨官衢
公墩我屋連烟蕪
百年冠蓋散如雨

黃金夜飛子孫去春風剪燭城西窻得君如璧不可雙
我才老愧八叉手君貌初酣千日酒東家當壚猩血衣
輕寒水郭楊花飛相逢且飲君莫遠

公無渡河

公渡河驚風無舟水揚波公欲渡兮將奈何公提壺黃
流萬里人為魚一壺不濟將焉如彭咸申屠死不朽殘
生取名亦何有南山射鹿春草肥隴西刈稻為美酒公
無渡兮為公壽公欲渡兮可奈何河流不及此恨多

丁都護

丁都護郎騎白馬今何處
丁都護郎骨今歸還
是否妾心痛似杞梁妻
夢殺夫讐夢無路采石江
雲陽渡斜陽江上山
無數後人不識都護誰
時唱此歌渡江去

秧馬歌和蕭養吾

天門龍駒來貳師
朝燕暮越千里姿
折旋蟻封乃不可
彼固信美非吾宜
江南二月秧事急
水田千畝肩雁隨
壁間木馬忽湔沸
欵若起廢逢明時
背輕腹滑騎不蹶

昂昂首尻高過犁方畦曲畝翠分路意會規矩無差池
平生芻豆了不願獨以筋力充人飢驪黃不形牝牡混
踈齧俱泯兒童嬉東家少年輕稼穡千金市駿窮所之
看花九州誇疾走世路險遠難為期不如田家水土熟
與汝老大長相知借汝襍襖覆塵盆錦韉青絡非汝思

木牛歌和蕭養吾

吾聞景升養牛千斤肥椎之不了士卒飢王生號牛八
百里徒營蹄角將何為此猶虛名乏寔用負任毫末了

不支何如武侯象其似獨化枯槁為神奇平生憂人不
自食餉運常飽千里師刳心俯首竭筋骨氣象深穩人
誰疑中多抱負外遲鈍論功猶勝狂犢馳雖無奮勞効
耕種尚以微力裨興衰自期中道可不廢雖有捷徑寧
能趨惜哉清渭不可渡不得束載四海隨我嘗讀書論
成敗魏不足控為吳持江陵蹶羽秭歸歟郿南衰髮秋
風知前謀既輕後過重天意蹉跌長如茲浩歌木牛感
豪傑空有遺恨供人詩

送廬陵丞孫美任歸寓常州

廬陵丞公北文獻鳴琴坐堂如子賤家慶相傳節孝門
政聲早入循良傳刺繁政似矢發絃破奸不異冰消硯
山林百里卧犬鼯桑柘四郊歸社燕西偏獨僻吏塵空
往往蒼苔生匣硯八表清風竹滿庭三年春雨花成縣
路人聞名爭識面馬上踈髯青未變只今考滿書最功
遮道人情如乍見春留嘉樹高憇車秋入歸帆輕似雁
丈夫功名困下邑風鵬未試同榆鷄北門門邊楊柳店

迎新送故車蹄徧南來北去共官途誰識胸中五色線
燕臺黃金百尺高見說諸公交論薦江南山水雖可娛
未許種茶老陽羨

題劉子明南園

丹陽何人多竹石容來咏歌人不識平泉百姓遊者閒
一笑臨風唾有力世間萬物如天花寓目猶須藏以室
城西老人好事者園亭自為諸賢立酒觴春浦集少長
詩帳秋風成甲乙美花爍爍照錦段新衣涓涓明練足

山虛月落琴調動竹深書靜書聲出諸郎秀穎壓餘子
君本種名今得實江南夏雨成豐年溪流映日清且連
便擬出城尋勝境為君援筆賦千篇

送張君玉謁天師

張君家住青原峯呵役鬼物驅靈露噓氣闔闢天門風
飛符招雨走怪虹又呼大化歸筆鋒黑水揮斥皆成龍
蜿蜒歲蟄尺璧中霹靂夜怒三湘東晨興啟筭濕霧濛
潛與西里為年豐天宗仙人朝帝宮赤騮布旆青瑤空

玉女執樂千芙蓉祥飈颯珮鳴牙衝君騎此龍為後從
百拜香案箋民衷使世無虎豹魑魅與射工五風十雨
聖賢懿哲常相逢仙人危坐拱手不言功

題白府判仲謙所藏錢舜舉岩壑圖

我如謝公好名山開卷著我千巖萬壑間亂烟遙峯出
縹緲怪石翠樹相回環忽然山破飛瀑落皎如仙人玉
帶垂雲端喧飈欲撼溪谷動使我毛髮森清寒不知其
間有何徑但見荷擔兩兩相追攀浮屠崔嵬蒼壁頂佛

屋隱映長松關下通窈窕知何處想見小溪穿石去沙
邊汲叟犬相隨橋上行人驢半渡林空路斷孤舟橫或
坐舟尾或疾撐左巖右灘地苦狹長篙落石如有聲我
疑桃源從此逝恍若風景非人世欲呼錢郎問其途錢
郎已去誰能呼

送劉玉成之杭

錢塘之景天下無我昔未游知畫圖吳山闌檻神仙壺
沙河燈火錦繡衢四城翠翹上靈隱萬家畫舫游西湖

孤峯梅花白雪廬大堤楊柳黃金株百年風物未盡改
游子那得聞其初錢王觚稜墮秋蕪趙家宮殿佛鼓喧
朝晡西風吹潮落越嶠夜角呼月沉姑蘇劉郎妙趣世
希有五色燦爛披珊瑚請君一往覽古昔酌以千斛之
酒鷺黃酥寫以文考賦魯城之筆千萬字吹以東坡吊
孟德之簫聲嗚嗚歸來錦囊罄蹇驢與君共簸明月珠

送邵有初之揚州

君不見凌風臺下梅如雪何郎踏徧官樓月淮王宅邊

芍藥開杜郎騎鳳雲間來名區政要才士賦登高擲筆
千霆怒風流調笑落人間坐使江山重千古我友邵子
工詩歌三生夢見杜與何瓊花夜醉后土觀錦帆曉弔
楊家河男兒辭親事遠役勲業飛騰須壯日秋風何處
却相思二十四橋吹玉笛

謝王宜遠餉黃雀

野田秋陰稻穗垂山禽來啄日以肥斑斑背點楚鳩色
煌煌腹借倉庚衣稍飢作陣帶雨下既飽睽翅穿雲飛

士人攜網巧規伺或布一網無脫遺高明購買貴初出
但取悅口寧論貲饌羹鮮淨凝琥珀入酒漱澁明琉璃
詩人尤喜體質滑錫以美號柔綿披嗟哉羣百性命易
一旦鼎鑊魚貫隨物惟有美足取害復以貪得忘罟罹
頭顱萬里奉包篚幸免遠貢遭明時吾徒縱食誠有愧
捫腹何以醉相知

草蟲

晴風麗日天地熙昆蟲草木同生機
豎花煌煌綴組繡

山葉翦翦明琉璃黃蜂天牛各有役白蝶彩蝶相隨飛
野蠶卧枝玉一笏新綢脫蛻冠雙綫角蝸吐腥螳臂怒
蜻蜓翼翦吳綃素蛛絲撒網專攫饕縛蠅似縛白門布
畫工胸有太極心秋毫點染追天真胡為所畫僅九物
終以殺機疑非仁嗚呼安得人心皆祥麟阜螽草蟲蕩
蕩共適周原春

題羅稚川小景

遠洲連岡近洲平高樹稀葉低樹青長溪浸日流無聲

中有數葉漁舟橫誰家飛軒接水亭沙邊客至扶杖迎
江村頗類浣花里人品兼似陶淵明

岩雨行

為安成汝源王氏
丙子禱雨仙岩作

江南六月旱彌盛黍稷冥冥赭如病良田迸火大龜裂
野埃馳空羣馬並汶山居士哀民窮擊鼓楓林事祈禱
樹日荒荒旗屢揚山風蕭蕭角相應阿香夜半起鞭龍
奪雨空中爭負勝黃流猛奔棄溝壑漲乳沉酣浸丘甸
槁苗髮委活欲回秀穎雲抽洗初淨鄉人飲酒交推功

曠老無飢羣播詠巖中至人何年來大旱寔司雷雨柄
年深情與居民孚災患扶持通喘警吾聞太平五日十
日一風雨山川不敢私號令嗚呼玉京九關蕩蕩不可
名且願羣仙活民命

彭清源用前韻相屬奉和為謝

君詩氣壑三軍盛大將貔貅如去病平沙萬里穹廬高
駿騎疾驅誰敢並我詩悴若荒隴苗雨斷泉枯望祈禱
又如涼蛩抱衰草淒咽秋風夜相應白頭不遇俱可憐

土偶桃人定誰勝君不見杜少陵流落灑西耕稻向天
寒襖褐無春姿大雪漫山沒鏡柄君不見陶淵明晚託
遠公蓮社淨孤松傲寄難覓醉五柳荒涼空入咏古來
文士多苦窮虛名不值一效磬江南微雨澹火雲少昊
行秋初布令相逢且勿論新詩不如斗酒歌呼樂天命

野人家

野人家瓦少茅半遮牆外橫青山墻頭出葵花逸屋桐
樹繞屋麻地碓舂粟如黃芽小奴高髻髮爬簷平生有

額不點鵝月色夜夜照紡車木綿紡盡白雪紗為言主
家頗豪奢繡羅作裙歌嬌娃州符昨夜急如火馬蹄踏
月趨官衙

殘僧寺

殘僧寺白髮僧幾個野潦浸殿隅青苔生佛座山門窺
月竟夜開畫壁吹風連歲破粥香久廢擊木魚飯少惟
應燒土銼經箱蝶泊藤花垂石塔烏啼松子墮為言空
門亦里役鄰寺終年擾官課寺中零落幸無田若使有

田亦奇禍

贈劉尊德善琴工畫

劉郎善琴如雍門萬感畢赴指下絃和如威鳳鳴若木
閭闔蕩蕩開晴天怨如玄猿嘯遙夜酸風孤馬行窮邊
劉郎善畫如鄭虔落筆飛雨大化懸豪鷹秋翻代北月
饑雁暮下江南烟悲崖哀壑遠蕭瑟斷蘆短荻寒芊綿
洞庭廣堊神忽動秋風六合心高騫九成韶鈞夢舜日
萬騎羽獵思秦川惜哉流落世未識酒酣自賞詩千篇

嗚呼明時材執袞袞班集賢安得有力貢之至尊前

放鮎魚歌戲和劉文遠

莊生觀魚超萬累雲海扶搖特其戲任公釣魚雖似痴
澗河蒼梧飽膏膩人間此物亦何為腹滿腥涎肉連尾
貸生不可成風雷烹食未足恣刀几蝟蝟小器如覆錫
不識江湖甘一滴古來魴鱖出入難獨特形微不藏跡
黃埃八月埋輪端南村北村嗟雨乾放渠清冷免螻蟻
慎勿再近珊瑚竿

題錢仲堅宣差所藏羅稚川煙村圖

荒村漠漠烟連山誰家野店兩樹間青帘稍出樹梢外
秋風敗葉寒班班路通白石流水亂長橋縹緲依山澗
漁姑得酒歸意速攜稚過橋如落鴈寒藤老木又一川
冒船方饌冒斜懸有魚有酒復有客風致何必能詩篇
亂鴉幾點天疑暮欲泊未泊環高樹小舟七八散前灘
或倚長篙收釣具君不見鷓夷一舸游五湖子陵羊裘
釣桐廬安知若人非其徒

山月亭讌飲和梁景行諸公

廬陵城西有宣漢王氏山月亭雲端臺楊誠齋嘗為作記今屬素本厚加改飾予亦嘗記之丙子八月招飲亭上梁景行蕭安國劉高仲諸公賦詩為和

城中樓臺如海市城外江上總清意蹉跎千載不見稱
主人每與名流避雲端山月高一時風流正在誠翁記
千峰相讓如主賓萬景競招如我爾今感秋風呼城閣
海塵夜揚迷此地衣冠淪失爽鳩氏耆老不記開元事
烏衣燕去無客來金谷花飛似春寐世間萬事難可虞

回首歲月如隙駒，故人_{有子}氣食虎文彩。早勝徐卿，雖
臺邊草樹回秋枯。臺下庭院開畫圖，香奩斲與文杏並。
紫鴛飛與翔螭俱，君不見楊家移石菱溪隅。風致更勝
劉家無，又不見天津故宅安家郎。卻翁小車時翱翔，君
今臺亭得勝地，偉事欲與二氏方。尊前傑士爭頡頏，諸
老鬚髮照日光。是時斜日滿座作詩要繼南溪楊，文章共垂百
代長。

廬陵十景同蕭克有孚有諸公作

青原春嶂

渡江十里山水清千峰萬仞爭娉婷
野花織成石家幃嘉葉合作王母屏
釣臺有泉出山背忽作玉帶相紆縈
東風游人不知趣日日車馬來傾城

神岡晚橋

兩江秋波燕尾歧千嶂春木鳳翅齊
道人結船布江面行者如蟻東復西
市頭烟起樵子急林杪磬發山僧歸
庵中老仙危坐穩付與萬古看斜暉

螺峯殘雪

城東青山女兒眉
天寒變作滄浪髭
晴風忽放寸碧出
亂白猶在蒼松枝
暎光薄射分衆色
斷續碎錦春離離
道人看山踏泥去
日暮拾得金螺歸

鷺渚斷烟

金牛寺前江水黃
大洲橫陳江中央
人家夕炊起篁竹
一段兩段青迷茫
去帆點點春雨暗
孤鳥漠漠秋空長
高樓書罷遙指顧
彷彿官賦來連檣

石礮飛瀑

年年麥岡野花紅
家家謁廟江水東
危岑巨石擘元氣
老樹白澗浮晴虹
玉龍飛下數十尺
彷彿疑是香爐峯
窮源一笑俯八極
萬壑千嶂號松風

西峯卧松

定光道場鳳墅東
古樹蟠地疑髯龍
參天元與風雨會
老大偃蹇山之中
千年琥珀結精氣
半夜笙鶴朝仙宮
太平明堂方論建
扶豎大用須良工

古城秋釀

大江蓼花紅滿堤堤上人家多竹籬
雨厨爭炊白雪甌
霜甕滿瀉黃酥卮城中少年好游冶
渡江買醉攜蛾眉

江東估客貪祭賽第一先酌蕭郎祠

地有蕭
衍祠

小洲暮漁

螺湖石屋江水平大船小船滿東津
舉罾出魚輒數十
落日光射金鱗鱗楓橋烟起新酒熟
共穿小魚飲西隣
大魚雖肥且勿食明朝賣與城中人

平園哀柳

周益公
舊居

城中書樓天下奇碧玉流水長虹堤堤邊柔條一千尺
鶯黃裊裊春風垂居民異代起華屋此物已槁不忍移
豈無他樹好顏色不忘丞相手種時

鳳墅斜陽

曾道判
廢園

城西仙園不可當花闌柳榭春風香酒樓彷彿竹西市
娼女結束杭州妝百年風流去如雨一笛落日寒荒荒
乘除自當返大樸君看燈火明書堂

元夕諸子孫小飲

梅外初升寶月圓
柴門春入菜絲盤
鼓鐘不斷山城濶
燈火無多野郭寒
童子折花偏愛節
老人持酒強為歡
牙旗鐵馬羣英事
謾賦新詩寄客看

社日偶成

西郭先生嗜酒盃
敝裘潦倒積緇埃
疎疎社雨梨花老
漠漠春陰燕子來
灌圃天隨餘祀菊
閉門仲蔚長蒿萊
衰年頗覺頭風進
烏帽何因倩客裁

賦杜氏秋晚紅梅用友人韻

君不見綠珠吹笛意態閒畫樓百尺垂闌干紅妝千年
不復識今日忽見春風顏又不見景陽麗華唱壁月醜
腮半露鈿花繁酒酣妙舞未肯散一笑婉婉宮井寒餘
妍尚可眩一世緣空化盡難為完坐令前身白玉質施
朱作豔嬌能言頗疑守宮點臂痕不滅又疑如意傷頰
血未乾淒風淡月疎竹外幽香著客能返魂同根霜雪
魁百卉未有早秀爭秋蘭煌煌庭院生曉色一樹變作

扶桑暎我欲呼坡仙叩門共醉詩清溫我欲呼東野長
安一日走馬看向來酒禁今已釋莫遣頃刻無罍樽

碧壺歌贈陳生可珍善畫

碧壺之山何處是直隔瀛海三萬里之驚涼琪花瑤草
春掩曖雲階月地秋瓊瓏九節之蒲可作杖千歲之鹿
時相逢但見安期子晉吹笙來往驂蒼龍亦有子房跨
鶴從赤松碧壺子君是仙家第幾宗戲翻墨汁寫山水
一點半點飄落成魚蟲請君試作碧壺之高峯使我指

點崑崙方丈東盡以世間萬事一問壺中公

玉壺歌又贈陳生可玉亦善畫

君不是費長房跳入壺中窺三光手攬八極一粟藏日
食天帝玉女之玄漿又不是竇侍御袖貯清冰三百柱
掛之萬仞迎風之寒露秋風吹上蓬萊顛地下空驚洒
瓊雨瓌瓌瓏瓏琢自太古前混混浩浩隨天圓中有素
液之萬斛元氣之千年化為天酒浩蕩直與黃河懸左
醉處妃右偃佺戲作山林萬化奔羽毛花萼雪落紛清

妍玉壺子壺中相去碧壺幾萬里可憐君家好兄弟妙
筆俱奪天機秘安得畫我壺之中日夕吹簫飲酒追逐
兩壺公

贈長沙王自得用之

君不是杜少陵亂離西游復北征又不是孟東野長安
走徧看花馬一簷兩屨稱詩人綿裘三斗長塗塵胸藏
琮璧世不識筆挾風雨天為嗔高門我我千石簾熊白
饑化饌人乳繡衣滿座扶風豪金釵列屋邯鄲舞酒闌

車馬散燭椽君來朗誦詩千篇畸窮不滿薄俗笑意氣
自與常人分古來英傑每如此事成千載稱其賢君不
見太平貞觀二十策當時同是新豐酒家客

賦歐園海棠和羅起初

蜀州海棠錦成畦昌州海棠芳氣菲名花自古憾不見
東風吹在西家西美人墜酒紅珠落半笑新晴半含萼
玉膚柔薄絳袖寒妝淚輕盈脂臉忤太真嬌睡金屋春
綠珠夜宴宮蠟新一時羣花盡妾媵娉娉嫋嫋真仙人

雨餘繁枝深綠淨好及佳時入觴咏花容相對易新故
人事無情有衰盛我昔曾同花下歡寶釵插映鴉髮盤
只今便能日日為花醉欲挽朱顏應已難

感舊行

余生九歲為至元十三年丙子避兵山觀李氏又三十一年丙午哭內兄其淵又三十一年為後至元二年丙子諸親相邀復留數日因思三至歲皆逢丙若有數然者

憶昔丙子宋祚變天兵南來混九縣舉家避兵竄山巖
道逢哨騎落鶻箭倉皇奔匿道旁家弓槊穰穰短牆見

當時脫命五步間，店叟焚香身手顫。行投李家日已晡，
張燈招魂具膳舖。老人攢眉論興廢，我時雖幼知艱虞。
又聞土兵在嶺外，肝腦滿地紅模糊。偷生度日四五載，
短衫窄袖忘詩書。聖朝右文庠序起，始復勉學思為儒。
兩家婚姻正稠密，冠蓋城闈相絡繹。君家氣運如新春，
我家貧賤如前日。却從丙午哭盤淵，六月赤熿行青天。
歲當饑饉路蕭瑟，殍殍橫野無炊烟。陂灘悍激落清浪，
草樹蒙翳號悲蟬。天道一周如電掃，偶向山中事幽討。

兵機定息太平久少壯丘墳童稚老溪流改徙棟宇多
短植參天修木槁後生秀者來如雲欲陳往事誰可論
烹羔擊鮮醉賓客東家西家邀款門所嗟淫雨連十日
不得登覽徒清樽天留老眼倘不死重來山水與子笑
傲觀乾坤

憶昔行送李省掾友仁從李龍川平章定寇

憶昔韓退之運籌辨幕擒吳兇蔡城夾道拜丞相歸來
却作平淮碑憶昔于公異掣頭露布從東渭文章功業

相久長一語精神照天地
亮奸小大雖不同賓主千載
同高風舳艫白鉞航玉虹
勁氣欲剗千崆峒丘夷穴踣
九兕斃溪湮壑倒羣蛟窮
莠稂擣盡嘉穀在鋤惡樹善
心元公城門夜開燈火鬧
童哇婦織村無哨四郊桑麻
與天平絃誦家家施禮教
懸知耆老歌盛德鋹斧春風
餘幼少章江水滿牙旗舞
勺陳橫空槌大鼓殺牛擊鮮
勞歸旅千斛鷺黃浮甕醕
相君黃扉君紫府先生作詩
如吉甫

題傅雲岩齋

商家良弼去千載天下常患無甘霖不知有雲捲海水
至今藏在巖之陰金支翠旗貫曙旭鐵騎蒼虎蒸遙岑
晴天白日作五色中有仙子鳴瑤琴鳳凰翼旌鶴參駕
欲出未出真無心聖時飛龍澤九牧五風十雨年穀熟
安得閒雲老巖谷

羅定翁家書雷致雨

炎風蕭蕭吹赤日道路行埃積三尺沙泉起焰江容輒

秀稻連雲今槁立西家藏蜴蜴漫死東池蹠龍龍不出
天高萬里如堅珉狂狃狃誰動色先生世家神仙府
豐隆吾兄阿香母謫居下界百習空猶閔顛崖墮辛苦
尺書半夜報家庭載雨滔滔赴南畝長臯回青短隴秀
如以黃馘飽膏乳誰言至人無私念唯諾終應勝號愬
八荒六合等赤子隔轍町畦果奚故嗚呼人間一室分
恩仇天工如此人何尤

桂隱詩集卷二

欽定四庫全書

集部
桂隱詩集卷三

詳校官中書臣 閔思毅

侍讀臣 孫球覆勘

總校官進士臣 朱鈺

校對官中書臣 王鍾泰

謄錄監生臣 劉田

欽定四庫全書

桂隱詩集卷三

元 劉詵 撰

古體 七言

上隴行

以下十二首皆至元丙戌至壬辰作

江南雨晴千里春
桃李漫漫催殺人
山人出門看落日
一年一年髮如漆
髮如漆兮奈此何
會看曉鏡清霜多
街頭古路雪陂陀
千人萬人朝暮過
燕姬細馬笑且歌
寘顏勒石高嵯峨
我翁仲寂寞空山阿
誰能酌酒相摩挲

遊沙山和蕭安國

書窻半月雲冥冥今朝有客天亦晴七年懷山始一往
宿雲捲盡羣峯明峯回水橋帶行路數尺便覺分俗情
穹崖白石饑虎踞髻髻樵笠玄蟻行軒車既令路人駭
杖屨亦有青山迎倦攀尚覺人語遠小憩先得亭陰清
仙樓下俯心忽動天風吹衣疑化城芙蓉崔嵬去未已
青原拔怒來如爭偉哉造物裂元氣削此蒼壁懸亭亭
臨風措碑誦未了虛谷洶湧波濤生江山千年如一日

是間風雨平復驚

舊為寇區

今人頭髮照溪水昔人壁間遺

姓名豈無樽壘可一笑獨懷南碣悲山陰同來豪士亦
不少狂絕如白歌如青風流益自愧寒鄙謔調未覺須
娉婷闔閭堊花暮眠鹿膝王脩竹春聞鶯丈夫登臨要
勝迹向來意氣終何益槎牙江頭樹千尺記我斜陽下
危石欲題妙語還自惜恐有仙人怪今日

南樓乘月

人間塵埃能幾何夜夜明月九州白獨提愁髮御秋風

漢江染之不成黑江流迎我來滔滔古今銷盡黃龍高
樓頭攜酒邀天飲我與殷庾為三豪吳姬膚肉映肪雪
笑倩坐客穿舞袍胡牀吹玉龍朱闌懸豪曹已傾四海
添我酒更推三山鱸其鰲苻堅石勒豎子耳尺組縻之
如猿獠昔人功名何足論惟有風流千載存當時結束
不成興誰愛明月來端門我起舞君莫回姮娥隨人不
可推君捉我影入我手酌君玻璃三萬杯

淮南芍藥

西施三十埋五湖
寬飄南國香骨枯
隋皇羣姬一朝死
迷樓妖氣夜如水
江南草木千載歸
廣陵芍藥天下奇
晴風羅幙春色午
輕塵微雨姑蘓池
東家繡鞵西紅絲
黃冠女兒學塗脂
屏風夜色丹砂泣
王孫偷醉青蕤濕
豹胎猩唇宴王母
滿城蓼蓼椎大鼓
油車翠幌推不行
竹西將軍舞虢虎
萬花夜逐錦雲空
四相化作神仙去
風流老守今種瓜
灌畦馬廐春日斜
城中羶車泥滿路
喚賣遺花人不顧

天上謠

戲效李長吉

瑤京夜宴弁紛星
洞庭神樂八荒聲
幼龍未起月忽墮
捫空路迷失仙纓
轉杭東海蓬萊曉
遙看太白當天小
海塵相隔青茫茫
玉玦海邊委秋草
鴈啼霜濕衆娥裙
綠毛斷耗三千春
桑枝千層拂人馬
春寒夢繞高丘下

和劉元翁

廬山江水之西流
今年涉我舟復舟
平生歲月向此盡
百里何必非并幽
伏波少游兩不可
玄髮如容誰能留

南飛鳧鷗吐鴻鴈我亦天地無幾求空山歲晏催客別
與子擊筑歌四愁陌頭雞鳴曙光發池上古木寒蕭颼
人生百年各有願養牛種橘亦得齊封侯

題蕭天叙韓幹三馬圖

高堂崔嵬立三馬蕭侯得之韓幹寫犀包曉解塵漠漠
霍如飛龍落庭下開元有道朝華戎吐蕃羅拜驪山宮
蕃兒拳髯帶沙礫朔風卷氍鶻落空玉堂閭闔開崑崙
權奇磊磊萬里同當時沙苑七十萬申寧岐薛連坊棧

五陵翠華長掩靄太平受貢祇貽患蜀道青驄後騎疎
金粟草木西風初豈知此事千古無天寒日薄人看圖

古桂

庭前古桂何時發數日空階積黃雪雨餘天上藥珠明
風起人間金翡翠相看竟日不得去况乃清宵對明月
天公生物隨人娛華寂從來同一色漢宮仙人理秋髮
觚稜千尺畫闌列夜深仙掌露華凝萬斛清風繞陵闕
長生未保富貴虛風流更落柴門客人生願欲復何盡

有酒無辭酌佳節

題胡忠簡家所藏九歌圖

崑崙之水西極來南合萬水澹徘徊山哀浦愁雷雨垂
精氣冲漠陰風頽里音巷樂氣所使陰陽轆轤何靡靡
放臣哀怨歌不足誰掃生綃更愁悴平生誓欲窮山水
風塵跼蹐不出里飄然蕭蕭毛髮起濯足瀟湘洞庭尾
皇車驂駕飄上下雲中渺漭光相射北渚風起吹參差
孫橈桂棹波濤亞九阰雲旗扶桑軒鱗屋擊鼓山鬼愁

吳戈提首靈宛轉荒庭白日寒蕭颺春秋祭祀豈有極
歌舞情竭君來食楚王寬厚國無禁民俗富樂流為惑
曲終翻見熊繹餒我欲添畫湘纍泣君不見淒涼三戶
魂未歸眼斷秦關路蕭瑟

題楊補之梅

補之之梅不易作况乃藏自澹翁閣澹翁千載忠補之
一世雄元氣擘裂乾坤冬開卷灑然見二公孤山之月
羅浮風澹雲萬古吹不融黑埃黯慘翠羽失小牕滉漭

重湖東塵心蕭蕭淡若水卧看青天露如洗

和友人牡丹借用山谷韻

幽園草青人不行三月晴嫩蜂無聲國香銷歇餘態橫
風醺玉環酒初透雨困飛燕體逾瘦可憐流落不登巨
洛陽百年闕遊驄馬塋年少今成翁相逢何事依舊紅

城中鼓

城中鼓日日送人城外土雕鞍繡組走滿街雪旒練幃
後無數路人環看爭歎嗟歎渠富貴如朝花明朝路人

還復繼桐棺敗布孤妻鬢嘉禾門頭春樹綠東市高歌
西市哭人生得喪空自多貴貧同盡當如何

萬戶酒歌

秦定乙丑真定吳侯來守廬陵議行萬
戶酒申請垂定郡民預喜賦詩相賀

城中禁釀五十年目斷炊秫江東煙官封始運桑落甕
官隸方載稽山船務中稅增沽愈貴舉盞可盡官緡干
先生嗜飲終無錢指點青旗但流涎今年忽縱萬戶釀
處處爭說邦侯賢富家遠郭買秫田小家盆盞爭濯泉

開城曉避麩車道築室夜甃糟丘磚便將相如舊渴吻
一吸擬盡長鯨川老翁童稚喜欲顛秋醉月下春花前
豐年五穀賤如土市上遊人歌復舞歌復舞邦侯堂有
八裘母共飲蟠桃幾千度春風吹醉九九州公但飲醇
丞相府

美曠明伯義渡因用友人韻

江南野水村復村行人不渡愁黃昏兩舟齊駕江濤喧
捷如天馬來天門秋沙殘陽春細雨南涉北來誰肯駐

嗟爾悠悠渡水人少待同儕莫先去

和蕭公立聽雨

浣花風高雨如電杜子廬破無處著飛茆滿空懸不落
孤吟但願寒士樂彭城二蘇秋雨中對牀舊約隨飄風
今年江沙踏晨屨明年禁鑰聞春鏞貧傷志大功業小
貴恨離多歡聚少古人今人共聽雨送盡千年昏與曉
癡兒酣睡簷聲春惟有詩翁愁獨新惜花惜柳復惜稼
憂家憂國還憂身我今多感肺腑裂剪燭西牕頭似雪

夢雲笑電閱多幻蘇早作霖真謾說驚雷夜半翻春湖
聲撼空山山欲無明朝八極生霽色絕喜流潤連瓜區
書生習氣元相似政坐談堅并辨異從今連牀夜雨但
美睡不用書囊萬卷誇強記

和友人

君才太白高世雄長劍出匣凌崆峒騎鸞鞭鳳不可窮
吹笙醉擘馳之峰我才老澀峽裏頽白髮千丈侯難封
褰簾無復東塗紅坐看青蛾充瑤宮雕蟲作賦如屠龍

世意澹泊師曼容道旁相逢仲與翁何異遺爪泥雪鴻
文章淵源端有從百仙効後無敢慵寸莛何由撞巨鐘
弱羽未可隨衝風十千美酒詩腸空酒酣坐見花濛濛
龍頭石鼎爐火中夜聯佳句彌明同睡覺不見惟奴童

和張觀光見貽

羣公冠蓋趨承明至治四海鸞鳳鳴天門閭闔雲五色日
照明堂韶九成張君才華振夕秀縱靶自可馳勲名豫
章隱林困萬石當春不及苔之榮吾聞黃河之水崑崙

來奔流萬里喧霆聲從君直上觀其瀾秋風吹我冠上
之瓊英

題丘介叔石山

驪峯北擁天祿閣莓苔千仞如橫槊汗水春來艮嶽山
東風萬里飛網帆人間富貴如反掌千古行人一惆悵
不如平泉醉踞蒼虬龍花間細雨馱裙紅不如太湖閒
嬉品甲乙賓客淋漓供妙筆富貴集竒生禍媒文章不
泯為物灾勢銷有力即挾去名在好事猶頻來不如山

中老詩翁疊高疊怪千萬峯不貪國爵學頑鈍不受客
拜忘清雄獨持堅白傲一世本不慕名那有勢今人後
人誰可虞此石終古留茲墟臯亭風日醉如酒坐看巉
巖搔白首子孫補天從有才勿袖此石歸蓬萊

織錦歌

南州織錦天下奇家家女兒上錦機蓬萊額黃染萬斛
渭川茜紅種千畦鳳刀冷淬并江水龍梭細琢炎洲犀
春波雨深淨如練接紅濯黛隨時變高鬟半髮玉腕明

心逐輪絲千萬轉晴漪翠浪舞白鯨細柳高花穿紫燕
青樓臨道起鞦韆蝴蝶鴛鴦逐少年月中三郎坐聽曲
海上漢武來求仙窮年玩歲容髮改研精極巧造化憐
陌頭楊花春鳥語東家西家教歌舞燕姬金捍擁四弦
百萬纏頭棄如土人生得意各有命豈無紅顏甘自苦
君不見郭門十里桑柘村蠶婦朝朝踏風雨

陳所翁子龍巖畫龍

所翁畫龍妙天下墨水千江醉傾瀉天地變色草木寒

霆電交作晝為夜陰風蕭蕭出空庭天落黃金壁間掛
前身是龍身不知龍來與語相娛嬉歲飢乖龍不肯起
畫龍夜出行雨歸不知雨到幾千里但見綃素濡淋漓
所翁丹成駕龍起雷巖傳家有竒趣蜿蜒半幅浩欲動
鱗鬣槎牙攫雲霧軒窗怒濤聲洶歎篋笥夜光亞吞吐
嗟哉雷巖今亦仙此龍神妙不再覩誰能久藏繫金柅
雷公繞柱窺囊褚只今春風急雨日夜多便恐一日飛
去驥天河

寄劉濟用萬戶

君如襄陽杜征南，輕裘緩帶我兩驂。
峴花江笛邊吏閒，風流千載成美談。
又如荊州庾征西，上流重鎮雄孤羆。
旌旗不動萬馬嘶，秋風颯颯紙自題。
世家桓桓產燕朔，山川英氣橫詩梨。
啖牛醜酒赤羽旗，讀書揮塵青油幕。
去年擁麾戍潮陽，貌貅六月飛風霜。
溪潭鱷去洗瘴雨，滄溟颯息凝清光。
暮春歸帆拂鷺嶼，滿城酒香咽簫鼓。
客來痛飲百尺樓，樓上青山浩無數。
槐陰畫戟列校滿。

榴花猩裙小姬舞丈夫窮達固有命才氣騰驤天所賦
嗚呼向來書生百年文字間一日乘障如狄山

和楊教授喜雨

南風吹野山荒荒低田初涸高田傷挈耒抱甕忽四起
翁稚婦女爭穰穰龍車連夜駕海水穗載天上千困糧
散為人間六月雨洗濯萬物無痛瘡稻粱分畦翠亂湧
桑柘連隴青遠揚頗聞一穗踰百實野老傳翫驚何祥
郭門輕風萬里道已覺飽飯無飢腸宮中化瑟調玉燭

史官上賀書非常聖人奎章講經理百辟冠珮鳴水蒼
山中之人歌擊壤不恨白髮如馮唐

丙辰歲晏無營友人有賦十題者戲效其體

冰港叉魚

玄冬水落江埧陳晨霜凍石花嶙峋耐寒漁師妙搗刃
斲玉下取潛淵鱗大鱗掉尾血貫眼小者驚躍弃不緝
絕憐貪利輕性命千載無復奉親人

雪林獵虎

朔風曉寒天地白將軍打圍千騎列南山老獸工避人
穿崖蔽木蹤不滅地窮怒躍戟亂衝十丈瑤峯畫成血
却懸馳背歸入城不見爛編見白額

竹外梅梢

誰家修篁千萬竿短牆流水朱闌干孤芳託根得春早
一枝斜出行路看遙疑青林烟初霽一點兩點雪未殘
小牕月落霜角動誰與伴此空山寒

水邊柳影

江南殘臘冰雪消人家垂楊如灞橋窺春嬌眼寒未動
彷彿已學東風腰東家女兒重歲月心逐時物先妖嬈
此時欲寄未可折直待二月黃金條

侯邸春盤

侯堂進儺簫鼓喧家家頌花過殘年玉盆清絲縷楊柳
隴西菘葦江南鮮繁絃脆管促拍手纖指高髻傳四筵
少年風物日日好莫同耆老談開元

山村臘酒

青峯抱田溪，遶門茅屋數十連。
炊煙水舂香，秫簸白玉槽。
壓新釀，鳴紅泉，黃雞肥，
彘更平聲，餞歲但取飽，醉不作。
筵城中爭學，比官飯，官釀苦薄，空費錢。

雪鼎烹茶

六花漫空羔兒傳，夜酣掬簷茗可煎。
人誇江南谷簾水，我酌天上白玉泉。
石鑿龍頭三足穩，松風蕭颯起濤煙。
人生口腹亦隨分，陶党風味無媿妍。

地爐撥芋

道人山房棕為簾鑿土燎火防冬嚴紅蒸楫杻森怪獸
灰中蹲鴟香可拈黑膚黯淡露玉質溫潤可以當劫炎
人間宰相君莫問趺坐且薦春醪甜

城角春聲

江城窮年柳芽黃家家辛盤鬪稱觴城樓夜吹梅花引
起視天宇皆飛霜牛衣有人久待旦冷銼三尺冰花長
勿云暖律苦未轉中有萬斛東風香

江帆雪影

朔風殷空夜飛霰

殷讀作引

百萬玉龍交曉戰茫茫天地如

大荒只有行波蒲一片推蓬四望眼光眩倒浸玉扉水

中見却疑馮夷宴未終舞女猶持白鸞扇

贈劉橘隱善棋

九州羣仙一黍珠二老一橘當有餘況今劉生止一身
橘多人少皆空虛千年白日碁幾局瀛洲玉塵今幾斛
智瓊額黃藏機多其間之樂當如何秋風吹雪種人首
安能橘中共君友須君騎龍追老仙借我此橘釀春酒

寒食行

去年寒食城東橋郭田野花春搖搖城中家家出上塚
久晴爭試紈與綃松邊細馬擁繡韉柳下輕車窺翠翹
竹籃買花分載酒酒酣遮路行吹簫高岡累累臨廣道
敗塹短籬編棘棗北人火葬哭望雲土人高墳歲翦草
老翁愴咽心未平童稚嬉遊那有情懸知十日辦一出
焄蒿不及行春心男兒百年驚婚宦慵癡未必輸精悍
黃金堆堂紅頰笑闔棺未了如雲散夏畦埋骨繞里閭

海上田橫無麥飯江山滿眼樵牧歌萬古行人一長嘆
我時醉卧山農家興闌行吟西日斜郭門排前競先入
却獨倚樹觀歸鴉今年孤村又寒食閒笑清遊無一日
人生時序良可驚疏雨閉門落花積

和羅昌逢吾廬亭海棠

閉門春色深深許日暖紫綿生霧雨主人慣看不常來
過客暫遊那忍去短梢未許隔牆知落片暗隨流水度
古砌侵泥新蚓行脩竹滿林幽鳥語紅顏流落未須嗟

妙語發揮吾亦主

題廬陵縣丞孫美家慶圖

藿羹負米待四方
繡輿迎歸兩鬢霜
女嬭嬋媛怨湘水
長陵握手驚淚滂
人生骨肉恨離別
旦暮目前愁困阨
天倫一笑豈有禁
造物相違每難得
丞公有母八十餘
朱幘扶養頰明珠
青袍黃黃洞庭橘
畫船白白江東魚
堆牀笏紱七子嬉
戀膝觴悅琴姊隨
舞觴花間高燭曙
踏踰柳下輕幘飛
平反入報慈色動
名勝款門珍饌供

金少回風吟
卷三
孝慈節義各自植一家昌運如春種太初賦命散萬殊
醜好悠悠亦異趨風化九州本不擇而乃衆美同一區
只今見姊如見母便擬彤書增節婦人間富貴未足多
三歎高風千萬古

醉歌行和答友人

七十古稀今已半東風把盞虬髯亂新詩稍與歲月多
狂態潛隨顏貌換洛陽十五載花行佳人擲果攔街看
寶釵醉折償千金馬上吹笙春酒暖妍媸萬古命不同

憂樂千端天不筭雪消水長江魚來鄰兒紫楫桃花岸
出門閒倚東風歌六龍弭節羲和緩

和友人

大江日夜東流下長憶當年來往社千金鬻賦過班揚
斗酒吟詩凌鮑謝祇今嵇紹自不孤如此雙壁眼中無
阿兄詞源倒溟渤李也學力包具區天風綺語忽照我
排扉堂堂結勻妥乃知大雅尚可作豈直黃初當突過
古來得名何必然一語邂逅或可傳兩鳥相酬鳴不已

金定四庫全書
卷三
為君一笑三千年

和羅昌逢蠟梅

傲寒獨擇風霜時
避潔不作冰雪姿
世人不識名以蠟
試用人力當愧之
空山耿耿澹正色
熟視雖媚不可嬉
雪踈點映忽異態
日黃滉漾疑空枝
北風緗裘卷半裊
玉膚微露紅非脂
先生世味等嚼蠟
獨愛香氣清詩脾
銅瓶燭下為細酌
喚花喚燭了不知
長安少年慕遊冶
千金買鞭映空垂
東家鳳珠騎竹馬
西家額黃學宮眉

何如此花有真意近道不愧禪林梔

再和

梅兄不見今幾時黃塵盡浣冰玉姿却疑來從金仙國
已覺顏貌俱近之水邊林下恍如昨都非都似驚相嬉
額黃萬斛塗未了頰怒半落宮簷枝縹裙下壓紺裙裼
緗袖醉枕紅膚脂天寒鵝兒凍凝酒日明蜂戶光分脾
暗香著人欲襲骨妙意未必和靖知小窻靜畫膽瓶古
長廊微雪珠簾垂一枝几案誰所置便覺春意生曉眉

金匱山房全書
卷三
勿嫌吟詩苦不似酒觴更倒黃金椀

和羅昌逢叙別

南山十里橫江濤截流峙以巨石豪

昌逢所居地名豪石

風流文

獻鬱相望一笑不待鴻濛遭春遊朝縹閭風馬海釣夜
飽任公鰲堂堂九州白日麗八翼不墮誰非陶天荒路
斷鳳凰去歲歲茆屋秋風高我如吳蠶出已晚意欲作
蠶何堪綠君才過人氣愈粹內法九醞中山醪長篇一
瀉縱河辯妙意不語如禪逃坐令陽阿與下里嘔啞共

雜雲中璫丈夫有願各坎壈牽灘百丈誰能篙老謀壯
事了不念客中飽食聊遊遨豈無躬畊舊泉石歲久繞
宅生蓬蒿冥鴻學飛志四海決起已倦鳴求曹長鏡短
衣會不遠卜鄰共種秦人桃

再和

人生斷梗隨春濤世事九馬分秋豪驅馳未必天與力
豐悴政信吾所遭東家公子出富貴嚴城夜市看燈鰲
春濃玉鞭墮漢裊天寒翠袖圍秦陶車懸湛盧結死客

一笑北斗黃金高田翁負郭繞耕種冬稻春雪春絲繰
溪魴登腴玉色菜園彘薦羹鶩黃醪詩書不識肝肺朴
處世忘世天刑逃先生窮年弄筆墨飢吟欲學仙家瓊
搜竒獵險不肯縱九折下轍瞿塘篤荊州登樓薛彈鋏
但以歲月供遊遨主人惜別君可飲搏雲豈必賢翔蒿
不見種瓜東陵邵不見抱槩豐中曹短歌未了起相語
我為土偶君為桃

和羅昌逢

字江五月輕帆漲南風飄飄捲衣浪古人百里肯重尋
相逢喜見平生心窮通慣見貌難老談笑生風人愈好
新詩猶欲俎豆予倦遊久已如相如夢中占夢更何據
鄉人說鄉念歸去春花繞屋菘菹長有酒不願求西涼

送歐陽雲瑞赴上元縣尹

秋風吹帆秋日白傾城車馬送行客送君宰邑古金陵
墨綬緋袍鬢猶黑金陵壯觀天下佳青山銀濤遶人家
城墻夜轉晉時月市門曉戴吳宮花樓臺萬戶散晴雨

鄉井昇平盡歌舞南商北賈朱雀橋童兒咿啞五方語
崇臺百尺飛清霜人物高誇網與滂鸚鵡搏空肅南紀
鷺鷥畫伏安敢翔君由省郎再製錦文采從來多善政
路人爭看六一孫臺府達官俱起敬古來縣宰名誰留
前有子賤後太丘請君整駕追前猷

送楊拱吾應昌府判

昔年金宋通盟處今日春風花滿路輕裘走馬江南人
高髻彈絃河北女水肥魚美如截肪爭壓蒲萄留客住

風流通守誠齋孫政事文章俱有譜盛年得此未為遠
回首都門猶尺五茫茫煙草低牛羊中有李陵降淚土
請君飽食應昌酥有酒不須酌今古

題劉良用詩塚

劉君埋詩黃土深曠視六合無知音冬雪冢冢塚千尺
秋風萬壑同哀吟子期邈在九霄上陽冰一去終無人
君不見道山藏書高於屋萬古何人辨珉玉

壽蕭孚有贈以香譜琴律老蘇文清溪竹

我昔曾友蓬萊之羣仙天香飄飄襲夢沁骨清無煙仙
人譜之示我以秘玄又聞五絃浪浪石室如秋泉祥鸞征
鵠雖離夜度乎遙天以律寫之人間傳何人高冠吹藜乘
雲哦古文一史盤礴手持生綃修竹微雪寒娟娟雲階
月地疑是長生之圃不老之垣邇來三萬八千年當時
四物還依然卷贈吹笙騎鳳之雲聞祝渠住世如南山
之竹高且堅坐評文章飛霞千仞追躡往駕而孤騫狻
貌永日傲兀乎玉堂之細旃致君重華薰風復來解愠

乎八埏

湖山歌送攸州武寬則再入京

寬則自號湖山能詩琴客
京久諸名公多贈以言

洞庭瀾漫萬水會衝山突兀千仞外青天偃蹇浸其尾
白日跳丸出其背地維窪圻波濤高元氣淋漓雷雨霽
其間人物多豪英山為襟裳湖作珮武君講書河西府
貌貅動容熊虎拜玉京羣仙迎笑談夢斷依稀廣寒界
始知十二宮中玉李奔馬周富貴不係常將軍武君長

才有如此秋風彈琴望天閣琅玕五色騎青鸞嗚呼衝
山之高何不拔在居庸脊洞庭之大安得上接黑水渾
坐令武君官爵高大難比論

贈東湖山長劉叔謙之京師

一中至道生極先唐虞三代皆自然九疇之五貫萬事
吾身養之玄復玄五雲仙才豢龍子讀書不作迂曲士
手持春風行沂雩夢逐帝珠遊赤水華池崑崙日夜旋
野人或見光燭天急欲捫之不可得忽然復返千丈淵

左參處妃右西母鳳凰翼轅駕白虎凌風汗漫天地間
逢人戲與麒麟脯朝馳潮陽看潮來暮援北斗酌酒麻
姑臺吹笙下招梅子真笑問東湖之水何年開朔南諸
子環逢掖坐擁臬比說周易文章欲挾春濤飛夜夢天
花生鉅筆乃知仙人變化無不為光塵出入相娛嬉俗
緣千仞徑度盡濁世糠粃秋風吹秣今兩袖珊瑚雨要
上清都謁明主蓬萊道山五百年前身魯宿瑤花圃君
不見張子房摩挲編書開八荒又不見李山人白衣騎

金史四庫全書
卷三
馬行帝傍古來豪傑盡如此世人那得譏其狂

送忻都總管第五子歸揚州

沙公昔乘太守車金帶十圍長髯鬚邦民感恩若父母
出入爭看填街衢大兒相繼分半符春風甘棠何處無
十年父兄不可見見君風致猶相如身當世賞讓其季
直以此意為母娛江南魚笋江北酥斑衣捧觴繡繞輿
自言孝友有至樂金章紫綬非所須為兄雪冤北燕闕
為兄收骨南海隅急難懷死志鐵石塞風瘴雨埃滿膚

韓穆愛弟推厚爵潘郎奉母誇閒居退之念兄如念父
濤瀧萬里攜孳孤世言古人不再得古人今人還可徒
清時卓行須論薦明當整翮金華殿山中酒香催別帆
五月南風浪如箭揚州平生未得面寄語二十四橋須
一見

律詩 五言

送文學山赴召入京二首

禮樂通三極衣冠集九天遂聞嵇紹用益重伯夷賢勸

激前朝少寬宏百代傳蒼生須一出珍重講經筵
徵召來羣望崇高立至難聲名先世重出處後人看丘
壑多深念輿臺給近歡寄詩規頌在未敢效旁觀

歸鄉即事

七月適故里一涼宜病翁過雲輕弄日飛鳥逆衝風熟
面峯巒碧迎人柿棗紅向來饑載道不擬見年豐

故里夜坐

故里復秋夕客懷誰與同澹雲低近屋涼月緩行空道

與身俱拙愁兼病作翁閱人惟老樹語夢有鳴蛩

促織和工部韻

促織不自苦秋來偏惱人十年夫戍遠萬里客辭親
翳燭頻燼淒淒月向晨此時應入耳墮淚實情真

省西隱原二首

遺魄戀鄉里斯文委草萊豈無狐兔穴猶有子孫來
白日葉自語秋風客獨哀玉華鐘鼓動欲下更徘徊

四世共丘隴空山幾夕昕斜陽照行影白首愧先墳野

水依田落寒雲到嶺分任溫豈不好無力振雲聞

任昉
溫嶠

二人子孫
皆不振

八月十三夜聽雨

去意久超忽悠悠終滯留石柵中夜雨苜蓿小園秋天
地誰相待燕鴻俱自謀百年寒暑易寒淺實堪羞

山野中秋有懷諸子姪二首

百里不能返孤村圍碧崖茅廬佳節夜秋雨老人懷多
病猶能賦長貧更寡諧中郎諸子姪今日定誰佳

他夕豈無月中秋偏作陰緬懷人生事安得皆如心夜
久鄰機息山寒墻葉吟村醪堪一笑恨汝不同斟

山莊阻雪

三日不出戶巷深交馬蹄鳥衝危雪下樓掛濕煙低惻
惻衣疑薄荒荒眼欲迷故鄉翻似客買酒短橋西

和蕭孚有二首

蕭子鄉邦彥論交契誼深未應忘共語政自少相尋久
客秋風鬢孤城夜雨心賡酬慙獨後衰朽懶清吟

經春慙簡出門巷草萊深庭樹間能種山苗病獨尋談
多妨養氣客去得觀心靜聽林間鳥間闕似學吟

和張漢英五日席上自壽二首

曉戒籃輿具出門還待晴不慙衰境至長憶故人生佳
節吾堪醉青年子有名蒲花明似玉偏欲助詩情

應俗疲終日詩書肯興闌才通今世許交久古人難綵
服劬勞報清樽節序歡須知仙道苦九轉始成丹

用呂生韻贊余學正祈雨

舊穀呼庚癸羣龍戰戊壬風生廣文座涼入使君琴濟
世非無術回天本在心明時須傑士早報佐商霖

正旦雪凍拈筆

庚午大饑

老去復新年華顛豈更添晴將春意薄霜助雪寒嚴酒
貴歡無具庭花迹可潛尚餘詩興在凍筆不勝拈

用前韻答梁景行

凍沍過常年頻聞物價添雖云為歲瑞政復厄冬嚴安
得田園老無多學問潛少陵應解此酒碧得時拈

用前韻答彭琦初

力作不逢年園荒蔓稔添漢廷從策董桐野有耕巖衰
髮禁寒燠春機到躍潛啼飢渾不顧書籍賣堪拈

和邵有初遣懷四首

郎君東閣貴驥子渥洼生俊譽王文度青年陸士衡江
山開宦轍風雨助詩情豈必曾相識相逢可蓋傾

從親古云樂綵服戲青春好學無勤怠論交畧貴貧人
從召公化客過阿戎頻近說乘龍喜文章定有神

每見清談勝豁然人意開書如秋蚓結才擁蜀江來雪
盡春生柳沙晴路有梅柴門長寂寞相過定無猜
經世懷深蘊培風肯小留定知飛食肉早已學為裘我
老三三徑君馳九九州往還慙簡畧正復近天遊

和邵有初郊行

久凍餘趺坐初晴偶意行花濃慙客鬢酒薄勝人情野
廟春旗動山城暮角清悠悠百年事倚伏斷雲橫

送鍾子隆夏五歸省親

鍾子後來秀今年客郡時學知三日別樂慰四親思門
柳人歸早塘蒲酒熟遲誥封應少待志養政深期

送醫官林性善歸故鄉

林君妙醫國才氣亦南琛一郡昔無病三年見此心古
槐官局冷新葯野雲深五月禾山雨相思寄短吟

八月七日莞草曉行

半秋仍憚暑中夜問前途地勢平如陷池光澹欲無警
涼蛩亂語戒險客相呼奕奕東方白城遠得疾驅

山觀道中

佛嶺舊嵯峨餘齡却再過行雲粘地濕流水近山多巖
屋垂蘿薜沙田立鶴鷺百年親舊意相見欲如何

故里

以下三十首前至
元壬辰癸巳間作

故里留人住新秋起客悲不知橫笛處適與此心期夜
久風藏樹天清月動池平生遊射地壯日尚棲遲

正月二日

泥潦無來客題詩受午風功名山色外歲月雨聲中拜

跪頻懷舊悲歡始悟空九州春欲滿未許歎途窮

重到鷓鴣避兵之所回首二十年感慨係之

重入桃源路青山抱草廬兒童俱已壯兵甲未安居
楚叟猶迎客籬門欲礙輿雙親今可恨跋履記從初

九日呈艾幼玉諸公

強笑雜深悲忽忽見菊枝腐儒元費日今歲併無詩
山作登樓色天留隔巷思峴中名勝富聊慰此生遲

上元

風雨何堪出今朝已上元
卷泥交過屐祠鼓屢鳴村鬚
髮催吾少情懷應俗論
兒童渾似昔染紙對燈幙

春仲簡郭逢春蕭拱午諸公二首

稍與書相對青燈舊可憐
守牕驚逝日聽雨似它年
翰墨微生拙山林薄累牽
忘年多勝友持此慰拘攣

平生數君子交誼似輿桑
又作今年聚寧知去日長
江花春潰潰山水畫浪浪
欲整沙邊屐泥途可沒韉

城外晚眺

整色生歸思淹留負日長孤城浮水氣踈雨弄虹光俯
檻青裙女維舟白面郎莫忘沙際樹屢見下斜陽

和周叔恭

平生嵇叔夜徃徃掇皮真政使但三語寧當止半人江
雲難待雪門柳未知春好事詩成悵猶須一笑親

和袁鑿翁

病客終何似鬚髯日日深能詩今見子閱世自憐心濕
礎生花氣晴枝墮鵲陰村村風物好我自愛禪林

謝彭道存

匆匆今雨聚政似未相知歲暮欲何語秋風尚有詩庭
爐看雪盡門水試春遲如此悠悠者非君誰與期

寄古渡諸公

為謝諸君子長年意未終本無三日語政自此心同江
樹藏晴氣墻條轉好風倚樓觀病息無句寄興公

八月朔暮日有食之

太史崇臺睿明君德政勤切知似初月只道點微雲南

國暮稀見中原事不聞春秋三十六麟止竟何云

家兄學翁訪胡宣慰過宿寓所

四方復貧賤相視意何如燈火自深夜風塵尚異居東
行知有遇久坐正忘予請聽高風起應懷落木初

家兄去後一日對雨作

燕楚通倫軌文章老甲兵馮謹思附薛王粲早依荆薄
世誰忘勢他鄉喜見兄遙憐泥雨苦寂寞坐簷楹

舟中

故園春候早有客獨行舟朝氣著華薄野陰鳴遠鳩雲
分潭際樹帆上驛邊洲山水正有會衝風不可留

八月十五夜

去歲當佳節空軒但雨聲百年能幾笑萬里幸同晴身
世嗟猶昨江山自有情何人傳月蝕不寢欲三更

十六夜懷諸兄

相看自非節月是昨宵圓露下江山靜天虛象緯連開
軒從到處憶弟定三年坐念吳江夜清光滿客船

金谷卷之三
卷三
九日郊行

九日登高處，心情歲歲同。
平田初獲稻，曠野屢聞鴻。
風景悲塵世，江山閱寓公。
茱萸朝雨濕，愁報綠樽空。

對客暮坐

危坐高齋夕，東來喜友生。
空庭疎雨後，四壁亂蛩鳴。
燭至瓶花落，秋涼架藥輕。
西頭動刀尺，澹月上簷楹。

客途

天低疑即雨，野曠况多歧。
亦有人孤往，安知意不悲。
空

山鴻鴈少薄晚道途疑老僕談前事村深醉宿時

歸鄉

荏苒長如故逢人先自慙輿臺多速化禮樂竟虛談野
驛孤雲去風羶過客酣先人瓜芋地未得理長鏡

春雪

但云陽已盛春雪復霑途修木輝輝眩遙山漸漸無雲
寒凝不動雀晚間相呼無復望千里惟應寄一壺

寄友

吾友葉居士三年二已疎每來曾不駐今別復何如歲
月同為客勲名合著書先朝文獻遠風雨一欷歔

除夕

疎雨孤燈夜相看又歲除江山猶寓客親友絕來書新
酒初堪酌長愁未暫疎艱難吾敢恨百歲定何如

和范國用隱居

此客亦小隱吾生歲月流巷貧初有轍世變得耕丘樓
晚憐荆土湖春夢越舟臨渠見雲影偶坐各悠悠

與江東郭提舉季新

向來梅水上相望路參差久別聞君貴重來長客詩乾
坤萬事隔故舊十年思古道真如此遺簪尚可期

和家兄巽翁久別聽雨二首

夜闌不能寐長聽雨聲寒萬里風塵遠三年會聚難每
憐伯仁勝自作少游看不用聞鄰笛相悲正淚潛

去年相望苦風雨獨凭欄故我忻無恙慈闈得問安還
鄉春又半騎馬雪初乾何日離人事相持入碧山

久雨害稼

天下陰氣盛江南秋雨多
染盛吾敢望君相意如何
野曠鷹初鷲江空鴈不過
遙聞府中帖昨日已催科

和許中立二首

始識未逾壯重逢四十餘
狂隨春酒盡病與好詩疎
有賦堪懲咎無成託遂初
阿同頻共語時得問何如

諧世非無意斯文亦曷收
極知癡見笑尚以味相求
落日湖陰笛涼風水郭秋
何時同問舍高卧未須樓

瘞天

鬚髮忽如此今朝復瘞孫相看知極苦少待亦能言已
已成泡滅眴眴但目存老天均賦受天壽與誰論

元夕

節夕貧相值流年雪共新一燈遺老鬢四海後元春庭
樹猶淹凍盆花不棄人兒童書蠶卜樂意愧渠真

自和

老境憎寒劇陳人愧歲新梅花如待雪酒盞獨知春時

序堪搔首篇章謾累人悠悠供一笑浮世孰為真

九日憶蕭孚有

故人南浦去近日定何如聞滯鄒陽獄誰移北海書江
湖寒信早風雨遠音踈應對重陽酒何由得寄萸

酬劉以芳見貽二首

其家有花園
扁山中高處

山露沾琴潤山風到鬢寒酌多迷夢覺語久雜悲歡身
豈如泥爪鬚難染石肝不知明月外何處是瑤壇

山中似蓬島高處不勝寒邂逅千年意攜持一笑歡庭

花明酒盞岡月沁人肝詩壘堪凌斗猶須更築壇

正月八日會詩人堂和山谷韻

涪翁去不返復此覈空空古寺八泉在遊人百代同樹
懸山雨白門揜佛燈紅諸老詩應好誰當續舊風

遣仲子尚文歸故鄉後雨中獨坐

擾擾忽幽寂悠悠轉暮遲春濃心獨苦書快睡先宜幽
鳥窺癡客殘花馱夕池兒童行未返微雨最先知

故鄉南嶺

相去府城六十里而尚文又多病故去後見雨而賦此

輓文文溪宣慰

身世從違夢功名毀譽資平生惟客在後死有兄知危
涕秋風遠華顛嶺海期空餘千載意不得盡吾詩

輓劉須溪太博二首

蚤日驚吳洛餘年畏有聞蹉跎太博策流落大蘇文世
外風流盡人間論議分豈無千載淚不得灑公墳
海內劉夫子堂堂尚及吾相知能不淺一失恨何如白
日今三島黃河自八區終然四十誅不足盡欵欵

輓鄧中齋侍郎二首

海上青油檄城中白髮簪百年重得老萬事獨餘心過
客門嗤鳳遐荒字抵金平生俱莫料造物意何深
和音回雅誥偉意落羣公河岱苞流外兒童好惡中書
成慙未學琴在與誰同獨有任安意深衣哭北風

又代輓二首

雅望驚南北斯文屬古今艱危魯連意老大管寧心落
日空庵白秋風病髮深太玄當有識流落欲千金

問字酒盈座談玄轍滿門病餘仍托賸客去獨無言世
論從妍醜斯文豈怨恩相從無限意淚盡郭西原

輓李鳳林二首

篤行成迂濶垂言累隱淪儒林多未傳耆舊已無人家
學傳衣重門生負土新未須生世早相望一沾巾

苦學難酬志知名不為官百年供簡籍四境想衣冠顰
笑從浮世窮通得達觀風流今欲盡滿眼淚沈瀾

輓蕭方厓御史二首

絕域衣冠化南方繡斧明艱難心獨苦好惡事難平人
物增青史風流想素旌悠悠行路哭豈盡計私情

歲月無餘分功名不計身世方危獨行天若忌斯人精
鬱山川古魂流楚越春遙憐無盡意未必著堅珉

輓文母歐陽夫人二首

文丞相夫人留北
子學山學士迎歸

興廢知何與盈虛豈是真關河餘白髮鄉井記前身世
自哀書血天猶合釁神人生俱有母千載獨如新

曾哀穿塚吏又見表龍碑事遠兒童老傷多感恨哀總

麻千里合魂魄故鄉悲樵子秋風後母傷墓木枝

書血用朱

壽昌事言學山求母之切穿塚用田橫事言文山死節表瀧用歐公事言學山自為壙誌

代輓文母歐陽夫人

詩內凡言猶足謂不足猶須謂不須此后山所謂曹

洞禪不犯正位是也

棄俗寃親盡還家夢寐平鄉鄰無故物天地有餘生起
滅身從幻哀榮世自驚人間閨閨意猶足託碑銘

向來蠶織意豈識與興亡萬里心先死三年事已長子
孫身外足棺槨里中藏我亦非私慟悠悠獨涕滂

哭王鼎翁內舍三首

鼎翁安成人名梅遣少負
經濟之畧以賈生馬周自

許不肯輕仕事親居喪孝過古人蓋
才德兼備之士暨死士類咸傷悼焉

敏決唐如晦經綸漢賈生豈無才用世終以孝成名誰
復綱常盡何由造化平無窮人物恨灑淚看銘旌

過從能幾日訣別遂十年語自今朝絕詩應後代傳世
亡和氏璧友廢伯牙絃嗣孝多賢子悠悠信有天

少年聞傑譽謂在古人中豈意斯文好相看晚節同論
心非苟合研理似相攻月落聞鷄起長疑尚未終

輓胡宗瑞節推三首

高科良易致素志每難行
畫諾威靈霽平反朽骨生百
年身落落萬事意平平
滿眼方癡點懷公一涕橫

海內多先友如今可幾人
高冠餘後死一第是前身
雅俗形神遠窮通表裏醇
山陽寒笛斷宿草欲生春

早似何蕃出終成靖節歸
機心消古貌世道繫褒衣
貴賤原無與詩書豈悟非
悠悠興廢事高塚下斜暉

輓潮州教授李以翁二首

白髮居庸塞青衫瘴海濤平生餘志在薄宦累才高器
業庸流嫉篇章大化勞鄉邦人物盡江漢日滔滔

舉世論邪說公如詆佛韓論當閒暇易學辨死生難旅
櫬馳炎海銘旌表冷官向來知己遠讀狀淚丸瀾

輓楊節父二首

楊學文字節
父官同知

守道疑齊緩忘官似陸沉氣通刑獄命政服鬼神心州
郡餘才傑丘原一古今悠悠三命鼎落落四知金

吾里南溪路公今迹又陳闕西猶有族江右欲無人人

金匱日曆卷三
卷三
憶羊公美天知考叔純空餘鷄絮意墓草未知春

輓劉肖翁二首

花外青山屋琴書永日風卷舒千載遠談論百夫雄未
試長才用誰能雅志同墓銘公論定應傳逸民中
四海尊經意堂堂不可羣人言君已死我見子能文竹
簡春風在梅花晚日曛素車慙已後何日酌高墳

輓蕭吉翁

人生俱志願豐嗇豈天存賓客清時酒臺池故相園濟

人高產乘奉母效潘軒不盡詩書福懸知在子孫

輓高季遠

嗜學追諸老興門在一身鄉資分粟廩心是濟川人陸

橐常流羨帝經百世珍遠山曾約賦愁絕暮雲新

季遠有遠

山堂曾

許作文

酬曾允升

著賦何妨少談經豈必師平生當幾見同里早相知奮
迅由頻挫歡欣出久離苦心須必達猶有託金期

酬巖上人

吉水延興寺

風挾巖泉急雲分洞雨新
寺荒經起滅境靜失窻堦
石藤侵座庭鐘鼠拂塵
楞嚴收未徹半落案頭巾

和彭自遠

出郭俗妨興題詩雨廢春
相逢憎易別欲語恨難頻
江霧低城重簷花入牖
新踈慵知不怪我自撥皮真

袁從義招賞牡丹不能往用彭韻為謝

趣減仍妨雨詩來始悟春
相踈心獨在未老會須頻
美

酒留人熟名花似洛新為詢江閣意消息定應真

和張提舉登永新興文閣二首

邂逅成千載春風入鑄顏功名驚破白文采笑窺斑絕
港行滄海南荒識秦山如何貞觀治猶恨棄程關

醜好元無定公心水鑿虛風霆同氣化椿菌自才殊羸
馬寒花外新詩落木餘百年真幾見三歎獨躊躇

和張提舉題安福州書閣

高才成政譜美傳起儒林禮樂乾坤重文章日月臨一

金匱四庫全書
卷三
官驚道屈朞月見功深珍重經行地甘棠樹樹陰

和劉實翁後中秋

庚子

此地元無約窮年亦倚樓亂雲江市白落木鬢毛秋逢
節偏驚客資身可廢謀天多今夕月有酒未須休

府公召方士蕭山泉請雨約某日雨不雨以身

受責是日果雨

天道遠如此居然雨此時伎精疑命達事過覺言危大
府資增傳扁舟取載詩向來修省意寂寞欲誰知

送劉尚友赴汀州教二首

四海劉賓客儒冠似昔遊
文章違捷徑山水要清流
飛雨沾歸馬傾城望去舟
官程元有數早已恨淹留
小坡成譽癖叔弼托門生
政爾難為後終然早致名
客羶須道熟人事入閩清
珍重明朝路無因數寄聲

送文尚志赴寧州州判二首

盛德宜賢胄榮名起世臣
乾坤共少日閩閩信遺民
山入名藩秀春隨別乘新
大江清漲起回首媿知津

士患空餘志君今復近臣一官開器業二父獨君親
茶井行雲曉蓮亭釀酒春臨分無限意望絕馬蹄塵

春日江上

山市風歌樹花津雨漲泉路分歸越客春入下潮船
嗜懶終違俗無成數計年殘梅如有待耿耿映青天

和友人

樓月窺寒上林霜到晚留斯文須命重白髮為人秋
世味何妨熟梅花不受愁向來喬木意鬱鬱在溪頭

和鞏志道憲郎二首

嫉惡思桓典論交慕季心
共知天下獨信有古人
今經濟關時用驅馳閱事深
朱絃寧小試清廟待成音

聞譽乖同語觀詩早會心
本非前有約便恐後無今
壯事青雲濶秋風白髮深
猶須聞鬢尾千載貴知音

留印岡山中

村早谿源絕年虛鼠雀飢
庭風扉自語山雨容先知
窮達堪杯酒暄涼任鬢絲
梅花春欲動不盡歲寒期

故里

兄弟各逾老青林祗舊觀
午烟山驛靜社雨水村寒燕
子風當戶桃花客倚闌
莫論千載去且共一杯歡

八月十四夜陰更闌月明二客小飲二首

壬申

秋暑過常歲及茲還早涼
無言花外月隨意竹間觴
故友可誰共佳時良自傷
未憂明夕事聊復此徜徉

城中高列宴我飲不盈觴
二子了無語微風來自長
旱餘雲滿地酒醒月生廊
却憶吾兄老空山夜更涼

代輓文母歐陽夫人

憂樂三生夢，哀榮百世心。
生還仍有子，死別本無令。
風雨餘藤繡，江山照祝金。
猶須聞孺慕，行道自霑襟。

輓王隱士

學可高儒傳，心宜表逸民。
百年偕計夢，五世未衰身。
禮樂乖時好，階庭可席珍。
一門從似昔，四境欲無人。

輓陳隱士

世事寧須古，斯人已媿今。
孝慈千指族，饑溺一鄉心。
路

斷書聲在山空隱德深平生太丘長相望一沾襟

輓聶學正

守道成憎忌談經得苦辛斯文元有命今世復何人
舊頻凋喪風流絕笑顰明朝春草綠更過大江濱

輓劉天秀貢士

異代賢能士空山禮樂心飛揚知謹厚患難見深沉
取忌元違物能言勝遺金哀詩將底用萬一是知音

輓高志翔教授

悟早為才役吟工被墨磨生無百年半天忌一官多嗜
古心如獨同塵意自和人生須底物一石兩嵯峨

輓劉子章二首

福澤晚逾盛詩書早自修剛腸空百懦定力勝羣謀客
意花前酒書聲竹外樓諸孫今滿眼九地欲何憂
才傑古難見鄉邦幸有人相違十年久又作一丘新翦
燭山窓雨看雲水檻春南陽慙不送宿草一傷神

輓羅見大二首

官錄事

經術追歐夏科名並愈詹入官身似隱涉世德多潛時
竟難行道天如不福謙三喪今始塋老淚不勝霑

憶昔過從日清言早悟玄柳家從有子王令竟無年親

友生前合身棺火後全何時攜絮酒出郭酌荒阡見大少日

過從趣尚與俗異及登第謙約如昔薄俗便謂其不自
振舉吾嘗謂使衣冠士得如見大百數相視成風天下
貪傲習當少戢然竟不得年以死家禍隨
之不知造物意竟何如也故為之悵惜

輓毛齋芳二首

少壯元難挽天人苦異馳藝高文遽塋科復髮先衰鄉

曲空前輩功名又一時吾猶尊往行人但信穹碑
少嘗輕筆墨晚欲老田園世改聲名在山深齒德尊教
經元自信閱世與誰論有未知風致惟應視子孫

輓文遜志學士二首

聲名天下士人物玉堂風坐失杜羔孝真成嵇紹忠壽
無人世半論有後來公今古元如此江流日日東
世情貧自陋交道貴方知人共迎天使公仍似昔時相
收猶有意此別遂無期何必南陽送全勝百里悲

輓解昭子內舍二首

異代膠庠老空山禮樂身世猶尊善賦吾自敬全人縣
改遺民盡科興進士新悠悠相送者未解一沾巾
識公無弱冠讀誌亦華顛道寄人者俊年催輩後先濶
踈心獨在今昔淚潸然夢記東門路惟應樹拂天

輓劉子昭二首

科目心如少山林道自尊百年千變閱四世一經存老
佛資玄悟交游記格言風流何處識彷彿在諸孫

災疾偏成慧功名併作年山深者舊化德熟子孫賢巨
筆頻追誅孤墳定說玄古來賣志士相望一潸然

輓曾德裕學士二首

家出南公舊才超北學先少年金匱史壯節玉堂仙起
仆真成夢風流自可傳向來終大用端不待長年

丈夫不伊傳當復附揚班學獵千年上名成一日間無
誰歌種豆政自賦囚山短短如堪恨英英可復還

哭蕭安國州判二首

二十聲名起秋鷹縱遠空雄文西漢意和氣大程風一
念無憎忌平生肯異同悠悠真宰遠好惡若為公

早日分隣燭中年隔宦郵青衫南徼雨白髮洞庭秋風
誼真堪哭交游取次休短修同一夢華寂亦何尤

十五夜無月三首

久待中秋月還成今夕陰感時一杯酒悼往百年心涼
鴈去無影候蟲偏作音姮娥應耐老誰與汝同斟

今夕中秋月親朋各一天羣英洪浦酒二老浙江船

芳蕭

洲劉申齋
考試江浙

宇宙同有役山林獨信緣
五羊詩尚在搔首

更淒然

彭冲所去年中秋留
宦廣州寄詩時已死

去歲中秋月初歸自故鄉
老妻旋具饌稚子屢傳觴
閱事多晴晦吟詩隔在
亾麻惟哭聲斷燈影耿空堂

中秋和甥孫李玄時敏

明月不可待好懷誰與傾
衰年惟酒盞獨夜更蛩聲
風雨孤燈語親朋四海情
得詩還自遣何用計虧成

和羅士奇遊洞巖見示二首

桃花不可見春殿白雲齊
世外流泉好人間去路迷
神仙遊汗漫過客愛山溪
欲往今衰老誰能此暫棲

昔往興遄盡今遊期未齊
天連華蓋起山抱白雲迷
樹老時來鶴星低半在溪
故人題筆在遺墨似鴉棲

又和遊龍寂寺二首

境近不能往山神豈見哈
不知千載遠定有幾人來
古樹含元氣晴溪轉晚雷
老龍今已寂誰復與爭隈

良遊亦邂逅緩轡語相哈
寺悟三生熟山從七祖來
敲

詩聞愈島入社有宗雷何日橫塘路相從釣水隈

元日試筆示兒孫

已未

酒盞頻留醵鐘聲忽報晨天開元日霽雪度兩年春學
貴資身早心當與歲新科名雖外物未許遜他人

元日和尚文韻

已未

酒為消愁進詩因理病疎倘能家少累未問福何如臘
雨催庭樹春風入案書卷舒寧有道未免學蘧篲

送曾學萬入京

郡東有喬木詩禮接雲來昔荷丈人厚今觀此子才南
風三楚濶春日五門開郭隗閭閻子黃金為築臺

贈劉生季恭

之子恩江秀翩翩筆有神頗能研六籍蚤欲屈千人夜
雨蟲燈暗秋風鷄翮新科名直餘事吾道要知津

故里曉坐用立敬韻

曉起復危坐蕭蕭聞馬嘶歸雲山色靜宿雨竹枝低客
意空山笛秋聲隔屋雞廣南方盜賊疲卒困山谿

八月十四夜與姪厚對月

有酒不嫌薄空庭慰寂寥幸同看好月寧用計明宵驛
柳知秋早階蛩語夜遙仲容差更勝喬木未應凋

中秋夜楊伯允坐間以一年明月今宵多分韻

得年字

還往家相近棲遲意自憐賞心宜美酒撫節憶流年薄
暮秋初肅明宵月更圓

時十六夜方望

興闌橫笛起共步小溪

邊

十六夜飲道立姪孫小齋二首

齋舊為樓每看雲望雪於此

憶昔看雲處如今待月時
歌殘林影轉語劇酒盃進
堂構諸孫在桑榆二老衰
悠悠時序意誰與共心期

月輪明似水病眼看生毛

南諺云月子生毛雨落成槽

佳節留鄉好

衰年待酒豪星河三極動
風露九天高不盡詩書意
依依望爾曹

歸城道中

軋軋輿穿隴迢迢路向城
村煙茅屋午籬蝶棘花晴
偶

見迫田務坐慙疎禮耕遐瞻多內悼一樹白雲生

六言

清明和歐陽山立二首巳丑

江南二月三月野水一村兩村花落人家寒食燕歸山
館黃昏

細雨海棠成子餘寒江燕初歸立馬橋西沽酒行人未
試春衣

鰲溪山行和彭琦初二首

照袂晴江淺淺迎風青鬢疎疎看山拄杖欲倦得句畫沙共書

巖上石仙流雨灘頭春壑生雷回首鹿門總角鬚髯如戟重來

春日偶賦二首


官路落花馬過人家高樹鶯啼故里故人何處夕陽長在樓西

楊柳輕寒水驛棟花小雨官橋回首人間往事孤燈挑

畫春宵

和龍麟洲題黃次翁黃鶴樓圖

孫曹百戰何在大江千載狂瀾誰倚樓頭呼鶴秋風落
日危闌



桂隱詩集卷三